

# INUIT ATAQATIGIIT

## INATSISARTUNI



1.marts 2024

UPA2024/54

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Inatsisissatut siunnersuutinik suliaqartarneq pillugu malitassiat atuuttut allangortinneqarnissaat pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut, taamaalilluni inatsisissatut siunnersuutip nassuiaataani, nunat tamat akornanni pisussaaffinnut nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi nassuiaasiortoqartassalluni, tassani immikkut inuit pisinanatitaaffiinit aamma nunap inoqqaavisa pisinnaatitaaffiinit tunngatillugu. Naalakkersuisut suleriaasiat nutaaq ulloq 1. januar 2025 atuutilissaaq.**

(Inatsisartunut ilaasortaq Mariane Paviasen, Inuit Ataqatigiit)

### Tungavilersuut:

Nunatta namminersuleriartuinnarneranut ilutigitillugu nunatsinni innuttaasut inuttut pisinnaatitaaffii ersarissut sanioqqunneqarsinnaanngitsullu pingaernerpaanut ilaapput. Namminersornermut pillugu Inatsit najoqqutaralugu oqartussaaffinnik nammineq aqutassatsinnik pilersitsisussaavugut. Siunissami oqartussaaffiit amerlanerusut akisussaaffigilertussaavugut. Tassungalu ingerlanitsinni nunat siunissami suleqatigiumaagassatta qanoq naalakkersuinikkut naleqartitaqarnerput malinnaaffigisussaavaat.

Oqartussaaffinnik pilersitsinerput ilutigalugu naalakkersuinikkut ingerlatsinermi innuttaasut, inuit pisinnaatitaaffiinit nunallu inoqqaavisa pisinnaatitaaffiinit naleqartitaqarnerput naalakkersuinikkut suleriaasitsinni innuttaasut takusinnaasariaqarpaat. Naleqartitat Naalakkersuisut isertuaatsumik suleriuseqarnerisigut suliap aallartinneraniit inatsisissatut saqqummiutassatut siunniussap pisinnaatitaaffinnut atuuttunut kingunerisassai allaaserineqartalissapput. Inatsisissatut siunnersuutit suliarineqartut pisinnaatitaaffinnut atuuttunut tunngatillugu kinguneqaataasa qulaajaavigineqartarnissaat eqqarsaataavoq. Taamaaliornikkut annertuumik suliap aallartinneraniit pisinnaatitaaffiit annertunerusumik eqqummaariffigineqartarnissaat qulakkiissavarput. Taamaaliornitsiguttaa q siunnersoqatigiit inuit pisinnaatitaaffiinit suliaqartut soqutigisaqaqatigiillumi allat siunnersuilluarsinnaanerit inatsisissallu aallaqqaammut suliarineqarneraniit akuutinneqarnerunissaat qulakkeersinnaavarput. Siunissaq eqqarsaatigalugu Kalaallit inuiaat oqartussaaffiit Danskil Naalagaaffianniikkunnaarlutik nunatsinni oqartussaaffigilernerit ilutigalugit pisinnaatitaaffiit suut nunatsinni atuunnersut qulakkeeqqissaartuarneqartariaqarput.

# INUIT ATAQATIGIIT INATSIARTUNI



Naalakkersuisut inatsisinik nutaanik suliarinninnerminni inuit pisinnaatitaaffii, ingammillu nunap inoqqaavisa pisinnaatitaaffii aallaavigisassavaat, taamaammallu 1. januar 2025 aallarnerfigalugu Naalakkersuisut suleriaatsiminnik allannguinnessaannik nutarterinissaannillu peqquneqarnissaannik Inatsisartunut aalajangernissaat kissaatigaara.

Nunatsinni isorartoqisumi inuiaqatigiit assigiinngisitaaqaluta nunaqartuusugut pisariaqartilluinnarparput ersarissunik pisinnaatitaaffeqarnissarput, Namminiilivikkiartornitsinni oqartussaaffiit suli pilersinngisagut pilersinneqarneranni pisariaqavippoq ersarissumik inatsisiliornikkut pisinnaatitaaffiit malillugit inatsisiliortarnissaq.

Partiit isumaat tusassallugu qilanaarpunga, Qujanaq.

## **Pisortanut aningaasatigut allaffissornikkullu kingunissai:**

A/C fuldmægtigi ukiup affaa suligasuarnissaa 250.000. kr-ninik akeqassasoq naatsorsuutigineqassaaq.

## **Namminersortunut aningaasaatigut allaffissornikkullu kingunerisassai:**

Soqanngilaq

## **Innuttaasunut aningaasatigut allaffissornikkullu kingunerisassai:**

Soqanngilaq.